

52892/P

Suppl. P/ADY

Dupl. (2)

DISSERTATIO PHYSIOLOGICA
I N A U G U R A L I S,
D E

Sanguinis Circuitu Viribusque
eundem facientibus.

Q U A M,
ANNUENTE SUMMO NUMINE,
Ex Auctoritate Reverendi admodum Viri
D. GULIELMI ROBERTSON, S. S. T. P.
ACADEMIÆ EDINBURGENÆ PRÆFECTI;

N E C N O N
Amplissimi SENATUS ACADEMICI consensu,
Et nobilissime FACULTATIS MEDICÆ decreto;
P R O G R A D U D O C T O R A T U S,

SUMMISQUE IN MEDICINA HONORIBUS ET PRIVILEGIIS
RITE ET LEGITIME CONSEQUENDIS;

Eruditorum examini subjicit

R A D U L P H U S A D Y E,

EX INSULA SANCTI CHRISTOPHERI,

Societatis Medicae Edinensis Sodalıs,

Nec non

Societatis Physico-Chirurgicae Edinensis

Socius Honorarius et Praefes Annuus.

Ad diem 24. Junii, hora loquoque solitis,

——— Unda impellitur unda,
Urgeturque prior venienti, urgetque priorem.
Ovid. Metam.

E D I N B U R G I:
Apud BALFOUR et SMELLIE,
Academiae Typographos.

M, DC, LXXVIII.

(i.e. 1778)

250337



RADULPHO WILLET,

De Merly, in Comitatu Dorsetensi,

ARMIGERO,

S. R. et A. S.

S.

Cui, potius quam tibi, vir optime, quo auspice, animum ad artem medicam primus appellebam ; cui, potius quam tibi, amice charissime, qui mihi adhuc infanti patre semper venerando orbato vicem ejus supplevisti, curaque vere paterna me nunquam non respexisti, has studiorum, quibus favisti, primitias dicare debeo. Accipe, igitur, hoc grati animi, quamquam tali benevolentia minime dignum, monumentum, quod cum summa tuorum in se beneficiorum testificatione, et maxima, qua decet, reverentia, tibi lubentissime offert cognatus tuus devinctissimus

RADULPHUS ADYE.

Digitized by the Internet Archive
in 2018 with funding from
Wellcome Library

<https://archive.org/details/b30384291>

DISSERTATIO PHYSIOLOGICA

I N A U G U R A L I S,

D E

Sanguinis Circuitu Viribusque eundem facientibus.

P R O O E M I U M.

I. **A** Sanguinis circuitu omnes fere corporis humani functiones aliqua ex parte pendent. Eum inter et cerebri energiam mutuus intercedit nexus, adeo ut ille absque hac non diu pergere possit. Ei corporis incrementum et nutritio, secretiones variis in oeconomia animali consiliis intervenientes, partisque humorum nocivae excretiones, plane sunt tribuenda. De eo igitur hac in dissertatiuncula agere decrevi. Cum au-

A

tem

tem auctores multos, quorum fama totum terrarum orbem pervagata sit, de hac functione fuisse differuisse, multasque super ea, quae adhuc sub iudice sunt, motas fuisse lites, animo mecum reputem, manu cum tremula hoc pensum aggredior. ‘Etsi,’ autem, ‘in tanta scriptorum turba mea fama in obscuro futura sit, nobilitate ac magnitudine eorum, meo qui nomini officient, me consolabor *.’

II. Argumentum, quod illustrandum suscepimus, sequente ordine exequar, quaedam dicens,

CAP. I. De cordis et vasorum sanguiferorum structura.

Sect. I. De corde.

Sect. II. De arteriis.

Sect. III. De venis.

CAP. II. De sanguinis circuitu.

Sect. I. De cursu sanguinis generali.

Sect. II. De iis, quae sanguinis cursum demonstrant.

CAP.

* Liv. praefat.

CAP. III. De varietatibus in sanguinis cursu notatis.

Sect. I. De sanguinis in cerebro cursu.

Sect. II. De sanguinis in hepate cursu.

Sect. III. De sanguinis in pene cursu.

Sect. IV. De aliis, quae in sanguinis cursu reperiuntur, varietatibus.

Sect. V. De sanguinis in foetu cursu.

CAP. IV. De viribus sanguinem moventibus.

Sect. I. De cordis actione ejusdemque causis.

1. De opinione antiquorum, &c.

2. —————Boerhaavii.

3. —————De Gorteri.

4. —————Whyttii.

Sect. II. De causis sanguinem in arteriis moventibus.

Sect. III. De causis sanguinem in venis moventibus.

Sect. IV. De causis sanguinem in pulmonibus moventibus.

Sect.

Sect. V. De iis, quae, utrum necne aliquid ad sanguinem movendum conferat principium ipsius vitale, demonstrant.

C A P.

C A P. I.

DE CORDIS ET VASORUM SANGUIFERO-
RUM STRUCTRA.

III. Cum de sanguinis circuitu viribusque eundem facientibus scripturus sim, quaedam ad cordis et vasorum, quibus perficitur haec-
ce functio, structuram pertinentia, in primis dicenda puto. ‘Quibus rite perpensis,’ quo
verbis Loweri utar, ‘atque inter sese colla-
tis, magis in promptu erit concipere, quam
accurate, et quam apte constituentur omnia,
ad sanguinem in partes universi corporis
distribuendum *.’ Primo igitur de cordis,
deinde arteriarum, postremo venarum struc-
tura, pauca sunt referenda.

S E C T. I.

De Corde.

IV. Thoracis cavum membrana satis va-
lida intus obducit. Haec, quae *pleura* voca-
tur,

* Lower de corde, &c. L. Bat. 1740. edit. pag. 2.

tur, in duos divisa est faccos, anterius sternum, posterius *vertebris* adnexa; itaque *mediastinum* vel septum e duabus constans lamellis, per parietes faccorum sibi invicem admotos, format. Ad inferiorem sterni partem hi, mutuo a seipsis recedentes, et praecipue sinister latus versus tendentes, spatium, quo cor cum pericardio suo comprehenditur, relinquunt.

V. *Pericardium* ubique cor laxè circumdans, e duabus quoque laminis, tela interposita cellulosa, constare videtur. Exterior a mediastino (IV.) oriunda cum septo transversò tendineo, magnisque cordis vasis, connectitur; hisque etiam interior adhaeret tunica, ac in cor, ubi gradatim evanescit, adeo reflectitur, ut multum ad pilei nocturni duplicati formam accedat. Consilium hujus sacci est cor inter agendum sustentare, et humorem, quo perpetuo humectatur, continere; unde motus ejus faciliores redduntur, idque inter et pericardium adhaesiones praecaventur †.

VI.

† ‘ Siccato vapore, idem pericardium adhaeret cor-
‘ di,

VI. Cor ipsum corpus est cavum e fibris muscularibus compositum, dimidii fere coni a basi ad apicem usque divisi quandam speciem prae sese ferens. In sinistro thoracis latere, pericardio (V.) involutum, fere transverse sedet, parte plana septo transverso incumbente, basi latus thoracis dextrum, apice vero sinistrum, aspectantibus. Hunc ob situm, quae partes vulgo dextrae et sinistrae nuncupantur, eae strictius anteriores ac posteriores appellari debent. Illa autem nomina (cum magis sint in usu) inter describendum retinebimus.

VII. Corpus ipsius cordis duo in cava, quae ventriculi vocantur, per septum validum musculare dividitur; et circa basin utrinque cava duo minora, quae auriculae nominantur, reperiuntur, inter quae quoque locatum est septum, cuius in medio, dum foetus in utero gestatur, *foramen* est *ovale*, valvula sinistram versus auriculam instructum,

‘ di, aut in aliquo loco, aut ubique, ut nullum esse
‘ videatur.’

Haller, Prim. Lin. Physiol. LXXXIII.

tum, quod fere semper post partum occluditur, vestigiumque ejus solum manifestum manet.

VIII. Ad utriusque ventriculi basin duo sunt ostia, quorum alterum cum auricula, alterum cum arteria magna communicat. Haec autem membranis tenuibus vel *valvulis*, uti appellantur, sunt praedita. Quae auriculas inter ventriculosque laxae, et in his fluitantes, collocantur, eae in latere dextro tres, in sinistro vero duae sunt. Illae *tricuspidales*, hae ex figura *mitrales*, nuncupantur. Ventriculos inter arteriasque magnas tres utrinque sunt sitae, quae has versus porriguntur, et *segmoidales* vel *semilunares* vocari solent.

IX. Eadem est ventriculorum (VII.) structura. Vi autem et amplitudine alter ab altero discrepat; sinister enim, quam dexter, multo magis crassus et validus, sed minus capax. E fibris muscularibus, varium in modum dispositis, adeoque inter sese contextis, ut summa cum cautela recte nequeant separari, ambo formantur. Hinc inter nullos anatomi-

cos in illis describendis convenit. Hoc in loco autem fibras musculares ita ordinari, ut ventriculorum cava per contractiones singulas magna ex parte, vel ex toto, deleantur, dicere sufficiat.

X. Fibras vero hoc facientes *columnae*, quae *carneae* vocantur, ex ventriculorum parietibus eminentes, et superficies horum internas asperas et inaequales reddentes, magnopere adjuvant. Hisce etiam columnis valvulae, (VIII) in ventriculis volitantes, per *chordae tendineas* affiguntur; quae illas tamen ostia ex toto occludere patiuntur, sed longius aurículas versus recedere prohibent.

XI. Utriusque quoque auriculae (VII) similis est structura, quae aequae, ac ventriculorum, muscularis est, e fibris admodum varie dispositis constans. Superficies earum interna est aspera. Robore et amplitudine inter sese differunt; utraque enim cum ventriculo, cui respondet, his plane concordante.

XII. In appendices has musculares venae magnae, *sinus* vel antra utrinque concursu suo formantes, desinunt; quatuor, a pulmo-

nibus venientes, in sinistram, duae tantum, *cavae* superior et inferior appellatae, in dextram. Ubi autem in sinum hiat harum inferior, valvula Eustachiana, uti appellatur, se se ostendit.

XIII. Praeter vasa communia ad sanguinis circuitum solummodo pertinentia, quae supra (VIII. XII) descripsimus, alia sunt cordi propria, ad nutrimentum ei suppeditandum accommodata, *coronaria* dicta. Arteriae hujus nominis ab arteriae magnae (VIII) sinistro cordis ventriculo exeuntis initio, pone valvulas semilunares truncis duobus oriuntur ; ad basin cordis accedunt, eamque circumdant, deinde ramulos in totam ejus substantiam dimittunt, qui singulatim diffunduntur, venisque coronariis nascentibus finiuntur. Hae illas comitantur, et in sinum dextrum juxta valvulam, ad cavae inferioris ingressum sitam, Eustachianam (XII) praecipue desinunt. Nonnulli quoque ramuli in dextram auriculam, atque ventriculorum fulcos, columnas carneas (XI), inter eminentes, depressos, per sinus quosdam venosos, sanguinem suum effundunt.

XIV.

XIV. Qui nervi in cor sunt collati, ii a plexu cardiaco, e intercostalibus et pare vago coeuntibus composito, maxima ex parte proficiscuntur.

S E C T. II.

De Arteriis.

XV. Arteriae sunt canales e cordis ventriculis, utrinque unus, prodeuntes (VIII). Quae e dextro proficiscitur per duos semper ramos, in quos statim dividitur, pulmones ingreditur; *pulmonaris* inde appellatur. A sinistro autem oriens, ramulosque in universum corpus diffundens, *aorta* nomen sibi adepta est.

XVI. Haec vasa, si singula per se sumantur, formae conicae, cujus basis in corde est, aliquantum prae se ferunt. In majoribus, uti aorta, multos ramulos dimittentibus, hoc plane apparet; in minoribus vero, unde nul-

li rami inter longius progrediendum oriuntur, minus est notabile; namque magis in extremis cylindrica fiunt, atque capillaria, vasa-ve quae oculis objiciuntur perexigua, figuram hoc genus plane manifesteque habent.

XVII. Arteriis autem accuratius confideratis, coni, quem forment in ramulis fundamenta esse jacta, apicemque ejus in cor desinere, evidens est. Lumina enim ramorum duorum, in quos quilibet truncus arteriosus discerpitur, conjunctim sumpta, hujus ipsius lumine, pro rata ratione *, majora sunt. Areas igitur illorum, antequam ad extremas corporis partes perveniant, hujus multum excedere, procul dubio oportet. Et revera res ita sese habent. Sin autem Hallero, propter observationem sedulam ingeniumque acutum semper venerando, aliquid fidei sit habendum, in vasculis quam maxime fere extremis hoc aliter incidit. ‘In capillari rite,’ ait ille, ‘ea lex non obtinet, et ramorum summa trunci lumine non major est †.’

XVIII.

* ‘In ratione (secundum Hallerum) quae est circa
‘sesqui alteram, aut paulo minor, ut ramorum ratio
‘superet.’ Vid. Pr. Lin. Phys. XXVII.

† Hall. Prim. Lin. Phys. loc. eodem.

XVIII. Arteriae anatomice inspectae, et cum cura investigatae, e tunicis diversis constare reperiuntur. Hae, iudiciis anatomicis quibusdam, quatuor sunt tantum ; aliis vero, plures.

XIX. Tunica exterior a membrana partes, per quas arteriae transeunt, obducente, originem deducit. In thorace pleura, in abdomine peritonaeum, hoc illis praebet tegumentum, et vix quidem pro tunica propria habendum est ; namque non totas arterias, sed certas, quibusdam in locis, earum partes solummodo operit.

XX. Altera, vel prima vera tunica cellularis est, a tela cellulosa undique partes succingente, oriunda. Superficies ejus externa est laxa ; sed quo magis ad arteriarum lumen appropinquat, eo magis densa et valida evadit *.

XXI. Proximum praecipuumque arteriarum tegumentum e fibris muscularibus arcte inter sese compactis constat. Multum inter physiologos, an revera muscularis sit haecce tunica, adhuc disceptatur ; fibrasque ejus proprietatibus, quibus alii fruuntur muscoli, nequaquam

* Hall. Prim. Lin. XXIX.

quam praeditas esse, complures contendunt. Haec autem lis, cum de viribus sanguinem moventibus, et potissimum de arteriarum actione, brevi verba facturi simus, postea apertius dirimetur. Litem hujusmodi motam esse hoc in loco dixisse sufficiat.

XXII. Tunica, denique, intima laevis, tenuis, et polita est, adeoque etiam formata, ut sanguinem per eam labentem in reliquarum intervalla sese immittere non patiatur.

XXIII. Vasis tum arteriis, tum venis minoribus, arteriae non desunt. Per tunicam cellulosa (XX), nervis eas comitantibus, transeunt, et vasorum vasa appellantur.

XXIV. Pars arteriae quaelibet, cadavere inciso, lumen ostendit circulare, quod magis, quam dum animal vita fruebatur, capax; digitumque praeterea, area sua majorem, in se immissum valide comprimit. Hinc arterias elatere, post mortem maxime notabili, praeditas esse plane apparet; contra quem, vita substante, vires solido vivo proprias fortiter agere, verisimile esse videtur.

XXV.

XXV. Arteriarum est munus sanguinem a corde acceptum in universum corpus diffundere, ut postea clare demonstrabitur.

S E C T. III.

De Venis.

XXVI. Quaedam est arterias inter et venas similitudo ; variis autem discrepant. Illae, uti alibi (XV.) retulimus, a corde originem ducunt, ramosque exinde ad totum corpus dimittunt. Hae, contra, a ramulis haud conspicuis oriuntur, qui, gradatim inter se coeuntes, truncos sex praecipuos tandem efficiunt. Quatuor a pulmonibus venientes, auriculae sinistrae finem concursu suo, efformant ; ab reliquis corporis partibus in dextram definunt duo, finemque magnum venosum dextrum constituunt.

XXVII. Venae, quam arteriae, multo magis tenues. Sin autem Wintringhami experimentis aliquid fidei sit habendum, in-
eunte

eunte vita, arteriis validiores sunt* ; postquam vero homo annum aetatis suae trigessimum quintum excessit, arteriae venis firmiores evadunt. Elatere, sed minore quam arteriae, praeditae esse videntur ; in cadaveribus enim incidendis collapsae semper reperiuntur.

XXVIII. Varietas autem in venarum structura maxime notatu digna est valvularum earum propria ; hae membranae sunt tenues atque pellucidae, ab interna earum tunica ortae, adeoque formatae ut sanguinis ab extremis cor versus redeuntis transitum facile permittant, sed motum subire retrogradum eum prohibeant. In extremarum partium venis multo frequentiores valvulae reperiuntur, et in truncis majoribus rariores fiunt. Venae etiam ad viscera praecipua pertinentes illis ex toto vacant. In venis enim pulmonalibus, ramulisque venae portarum in

* Vide Wintringham's Experimental Inquiries, &c. et consule quoque Hall. prim. Lin. Phys. XLVII.

in hepar diffusis defunt, et cerebri quoque venae iisdem carent.

XXIX. Venae denique ab arteriis usu et munere distinguuntur; sanguinis enim ad cor ab extremis reducendi officio perfunguntur.

XXX. Venae, in modum arteriarum, e tunicis, quae aegre a se invicem dividuntur, et difficilius igitur demonstrantur, constare dicuntur. Muscularem eas habere tunicam auctores fere omnes negant, venisque in parvulis nullas videri posse fibras concedere volumus. In majoribus autem, quae juxta cor sunt sitae, quaedam conspici possunt fibrae; hinc reliquas illis non omnino carere ex analogia inferre licet; et praeterea experimenta a Vershuirio * instituta venas quibusdam in locis irritabiles esse plane testantur. Vis hujuscemodi a structura quadam musculari pendeat necesse est.

C

XXXI.

* Vide Dissert. ejus 'de Arteriarum et venarum vi irritabili, ejusque in vasis excessu, &c.' Vide etiam hujus Dissert. Cap. IV. Sect. III.

XXXI. Vascularia vasa (XXIII.) venae aequae ac arteriae habent; nervisque quoque non destituuntur.

XXXII. His de corde et vasis percursis, proximum est ut motum sanguinis ipsius describamus.

C A P.

C A P. II.

DE SANGUINIS CIRCUITU.

S E C T. I.

De Cursu Sanguinis generali.

XXXIII. Sanguinem rapide, et perpetuo per corpus moveri, nemo inficias ibit ; vulnera namque et haemorrhagiae rem ita se habere quotidie demonstrant. Quinetiam tam universe in circulo quasi movetur, ut, ubi ejus cursum describere incipiamus, parum quidem referat. Cum autem chylus, a quo sanguis originem trahit, in venam subclavi-
am finistram prius effunditur, et deinde per cavam superiorem ad hujus cum inferiore conjunctionem devehitur, hoc ex loco memorandum putamus.

XXXIV. Sanguis per venas ab extremis corporis partibus revertens ad auriculam cordis
dis

dis dextram, ejusdemque finum adducitur, et iis stimulo est. Auricula igitur cum sinu sic ad motum excitata sese statim contrahit, fluidumque contentum in ventriculum sibi proximum conjicit; namque valvulae tricuspidae (VIII.) ostium occludentes sanguinis impulsui facillime cedunt, eodemque tempore illarum praecipua transitum ad arteriam (VIII) obstruit, eumque ea prius exire, quam per ventriculi actionem propellatur, omnino prohibet.

XXXV. Ventriculus dexter hoc modo repletus, pariterque irritatus, in contractiones abit validas, et sanguinem undique comprimens eum viam, per quam transeat, invenire cogit. Valvulae tricuspidae ventriculi parietibus auriculae dextrae proximis hoc impulsu amotae, reditui ejus ad auriculam occurrunt, quod, itinere ad arteriam pulmonalem nunc libere relicto, facit ut in hanc effundatur.

XXXVI. Sanguis in arteriam pulmonalem receptus in pulmones distribuitur, perque venas, in quas transit, ad auriculam finistram

nistram et ejusdem sinum adducitur. Per sinistra cordis cava, eodem, quo per dextra, modo, viribusque iisdem, sanguis diffunditur, et in aortam propellitur. Ex hac per universum corpus transit, perque venas ad auriculam dextram, eundem ut subeat circuitum, iterum reducitur.

XXXVII. Quatuor nunc motus (XXXIV.—XXXVI) cordis proprios esse retulimus, duos, nempe, auricularum totidemque ventriculorum; intelligendum vero omnes non alternis vicibus cieri, sed eodem tempore auriculas, eodemque ventriculos agere; ‘praecedit enim motus auricularum et subsequitur cordis *.’ Hoc e vivis animalibus introspiciendis plane disci potest; et praeterea septum musculare (VII) utrisque ventriculis commune, alterum absque altero sese contrahere haud pati, manifestissimum est.

XXXVII. Postremo est notandum, quod auriculae et arteriae eodem temporis puncto agunt; dum enim illae sanguine implentur, ventriculi

* Harvey de Motu Cordis.

ventriculi sese constringentes in has fluidum vi tanta propellunt, ut diastolen vel pulsum earum faciat; dumque per auricularum actionem sanguis in ventriculos impellitur, arteriae eodem tempore subfidunt, et ad alteram sanguinis undam a ventriculis recipiendam, promptae parataeque sunt.

S E C T. II.

De iis, quae sanguinis cursum demonstrant.

XXXIX. Sanguinem per corpus modo relato (XXXIV.—XXXVI) moveri, observatio et experimenta plane testantur; et totum per terrarum orbem, saltem ubi medicina philosophice excolitur, circuitum Harveianum verum esse conceditur. Multa igitur eum firmandi consilio argumenta proferre quibusdam alienum forsitan videatur. Cum vero tantum sit insipientis quodlibet pro certo affirmare, ejusque veritatem nullis stabilire rationibus, quae ad circuitum explorandum

randum Harveium sagacem duxerunt, et ad eum probandum auctores nunc omnes adducunt, ea quam breviter exponemus.

XL. Sanguinis per cordis cava cursum demonstrant;

Imo, Valvula Eustachiana (XII.) quae sanguinem e dextra auricula agente in cavam inferiorem redire haud patitur*.

2do, Valvulae mitrales et tricuspidales (VIII.) auriculas inter et ventriculos collocatae, quae adeo sunt formatae, ut sanguinem, dum agunt ventriculi, in auriculas remeare ex toto impediant.

XLI. Munera arteriarum et venarum in sanguine movendo diversa sequentia clare ostendunt:

Imo, Sanguis in arterias magnas propulsus, propter valvulas semilunares (VIII.), in cor redire nequit.

2do,

* Aliquis forsitan rogabit, cur ad ingressum cavae inferioris solum posita sit valvula? Cui respondere in promptu est; nempe, sanguinis in cavam superiorem descendens pondus locum valvulae supplere, atque obstacula libero sanguinis per pulmones transitui eodem modo respondere.

2do, Valvulae ad venas pertinentes (XXVIII.) sanguinis cursum cor versus dirigunt, eundemque modo diverso moveri prohibent. Liquores in venas post mortem immissi, rem ita sese habere, fatis plane testantur; non enim nisi valvulae vi rumpan-
tur, humor quilibet a trunco venarum in ramulos earundem transire valet.

3tio, Arteria ligata supra vinculum intumescit, dum infra id pulsatio ex toto amittitur. Plaga supra inflicta, sanguis violenter prorumpit; si autem infra ligaturam incidatur arteria, nullus, nisi pauxillum e ramulis cum ea conjunctis, sanguis profunditur.

4to, Ligatura simili modo venae injecta, phaenomena his contraria semet ostendunt; namque infra vinculum vena statim turgescit, cumque ibi aperiatur, sanguis libere profluit; supra vero flaccida fit vena, exque ea ibi incisa nihil sanguinis potest emitti.

XLII. Modus quo transit sanguis ab arteriis in venas, motu ejus per utriusque generis vasa diverso experimentis aperte probato, disceptationem accerrimam multos post
annos

annos excitavit. Nunc vero eundem sanguinem tam arteriis quam venis contineri omnes confitentur; remque ita sese habere, atque sanguinem ex arteriis in venulas incipientes recensve ortas rivo continuo, nullo parenchymate, ut quibusdam placuit, interposito, profluere sequentia indicant:

1mo, Arteria, vel etiam vena, scalpello incisa, magna sanguinis copia ad animalis mortem usque ex ea emanat; talemque quantitatem haud unum vas comprehendere posse, jure concluditur.

2do, Sanguis in caudis quorundam animalium pellucidis microscopii ope inspectus, e finibus arteriarum extremis in ramulos venarum incipientes, nullo obstante impedimento, transire videtur.

3tio, Liquores in arterias post mortem per anatomicos immissi per venas redeunt. Sin autem ulla illas inter et has textura spongiosa foret, materia injecta in cellulas ejus haud dubie effunderetur.

4to, Experimenta infusionis et transfusionis in animalia, dum vita fruebantur, in-

D

stituta,

stituta, sanguinem ab arteriis in venas transmitti ostendunt. Periculum hujusmodi admodum insigne a Lowero factum, quod in alia hujus dissertatiunculae parte ex libro ejus excerpemus *, hoc verum esse plane testatur.

XLIII. Ex omnibus, quae supra comprehendimus, circuitus sanguinis generalis evidentissime patet ; sed in animalibus post partum, quibusdam in locis, atque in foetu nondum excluso, cursus ejus quodammodo variatur. Has diversitates vero ut exponamus proximum est.

C A P.

* Vide cap. iv. sect. iv.

C A P. III.

DE VARIETATIBUS IN SANGUINIS CURSU
NOTATIS.

XLIV. Cerebrum, hepar, et penis animalis in lucem editi, sunt partes in quibus sanguinis motus potissimum variatur. De horum singulis ordine verba faciemus. Paucae quoque aliae incidunt diversitates, quae post has referentur. Postremo de modo, quo sanguis in foetum diffunditur, hoc in capite agetur.

S E C T. I.

De Sanguinis in Cerebro Cursu.

XLV. Sanguinem ab arteriolis extremis in venulas nascentes transire, perque has grada-

gradatim coeuntes, ramulosque majores efficientes, ad cor usque redire, inter circuitum ejus generalem describendum retulimus (XXXIV.—XXXVI.). In cerebro autem, et partibus ei vicinis, res aliter se habet; venae etenim ad encephalon et ejusdem involucra pertinentes in cava triangularia *sinusve*, uti vocantur, sanguinem suum effundunt, qui per venas jugulares, quibus illi praecipue finiuntur, ad cor ipsum revehitur.

XLVI. E durae matris tunicaeve extimae encephalon circumdantis laminis hi sinus formantur; atque triplici modo a venis communibus distinguuntur: Namque,

1^{mo}, Formae sunt triangularis.

2^{do}, Multo magis, quam venae, validi sunt.

3^{tio}, Valvulis omnino carent.

XLVII. Sanguinis circuitus in encephalo varietatis haec ratio esse videtur. Ad cerebrum majore, quam ad alias partes, copia sanguis mittitur. Si vero ullae remorae causae, velut in aliis venarum partibus incidit, reditum ejus ex illo impedirent, multa
mala

mala lethifera exinde orirentur. Ad haec igitur vitanda, sinus formandos et accommodandos natura curavit.

S E C T. II.

De Sanguinis in Hepate Cursu.

XLVIII. Vasis duplicis generis hepar est instructum. Alia ad hepar nutriendum, alia ad bilem formandam, destinari videntur. In his solis diversitas notatu digna reperiunda.

XLIX. Venae a visceribus abdominalibus (renibus et genitalibus solis exceptis) sanguinem revehentes magnum efficiunt truncum, qui hepatis portas ingrediens, *portarum vena* dicitur. In hoc viscus ramulos minutissime diffundit, qui sanguinem ad bilem fecernendam destinatum vehunt. Per venas deinde hepatis proprias, quibuscum ramuli venae portarum extremi connectuntur, ad cavam sanguinem reducunt.

L. Vena igitur portarum in hepar diffusa arteriae munere perfungitur, quod forsitan
ab

ab usu ejus singulari pendet. Bilis enim secretioni solummodo infervit; de qua hoc in loco verba facere, nos ab incepto longius traheret.

S E C T. III.

De Sanguinis in Pene Cursu.

LI. In pene haecce solummodo in sanguinis distributione varietas notanda est. Arteriae ejus propriae non in venas continuas, uti in aliis corporis partibus, sed in texturam cellulosam vel cavernosam sanguinem effundunt, ex qua per venulas incipientes rursus absorbetur. Structura haec singularis penis erectionem facit; namque ideae jucundae, quae in mente oriuntur, adque venerem homines alliciunt, sanguinem, majore, quam venae statim resorbere valeant, copia ad penem subito mittunt, ejusdemque corpora cavernosa distendunt.

S E C T. IV.

*De aliis quae in Sanguinis Cursu sese ostendunt
Varietatibus.*

LII. Sanguinem in arteriis progredientem a corde cursum tendere, supra retulimus (XXXV, XXXVI.) Aliquando vero in arteriis extremis motus huic contrarius retrogradusve fit; cujus explicatio subsequitur. Praeter arterias, quae globulos sanguinis rubros vehunt, aliae sunt minores globuli unius non capaces, per quas pars tantum serosa transit. Vasis igitur certis globuli rubri continentur, cumque, velut interdum accidit, arteriae quaedam serosae adeo dilatantur, ut globuli rubri eas intrare valeant, progressui horum ulteriori obstititur, retroque, diastole cordis substante, moventur, perque ramulos vicinos cum vasculis serosis conjunctos, sui satis capaces, vasa majora tandem attingunt.

LIII.

LIII. Hic globulorum rubrorum in arteri-
as serofas ingressus *error loci* vocari solet ;
atque inflammationem movere a Boerhaavio
celeberrimo, ejusque aemulis, dictus fuit ; sed
contra hanc doctrinam pugnant observatio-
nes Halléri, qui, microscopii ope, sanguinem
motum supra relatam (LII) retrogradum sub-
euntem conspexit. Illi etiam adversantur
argumenta alia complura, quae hoc in loco
proferre certe non nostrum est *.

LIV. Postremo, notandum est, quod san-
guis per pulmones non semper ex aequo libere
transit, (ut postea exponemus) ; sed, quantum
ad cursum suum spectat, praecipue, sub a-
ëris expulsionis finem, quodammodo inter-
pellatur ; namque pulmones eo tempore ma-
gis contracti vasa sua sanguifera comprimunt,
et

* In libro qui inscribitur, ‘ First Lines of the Prac-
tice of Physic,’ a Culleno illustrissimo, professore nos-
tro dignissimo, nuper edito, doctrina et Boerhaaviana,
et aliorum de inflammatione, argumentis multis refel-
luntur, et causa eam continens ingeniosissime et lucide
explicatur. Cum vero hoc ejus opus omnes medicinae
studiosi haud dubie perlegerint, de illo nihil amplius di-
cendum putamus.

et libero sanguinis per eadem transitui obfistunt. Hinc fit, ut ventriculus dexter non ex toto depleatur, neque quantitatem fluidi solitam ab auricula sua recipere valeat. Sanguis igitur per venas cavas revertens retropellitur, pulsusque earum juxta cor oritur, quod ex vivorum animalium conspectu evidenter apparet. Praeterea, motum hujusmodi sanguinis venosi retrogradum in cava descendente ad iliacas usque percipi posse, veri est simile; cavaeque ascendentes ramos ad caput pertinentes ab eo dilatari, sequentia monstrant.

LV. Particula cranii sublata, adeo ut in conspectum veniat cerebrum, hoc alternis vicibus tumescere, extraque illius foramen protrudi, deinde subsidere repertum est; quod ex diastole arteriarum et earundem systole sibi invicem succedentibus pendere existimatum fuit, antequam Walbowius, Halleri condiscipulus ingeniosus, veram phaenomeni explicationem in vulgus edidit. Hic enim cerebri tumorem et collapsum alterna inter et arteriarum diastolen et systolen non conveni-

re; sed illa longioribus intervallis quam has fieri, atque respirationis statui semper pro rata ratione respondere, ita ut, aëre in pulmones recepto, cerebrum subsederit, illo expulso, intumuerit, observavit *. Hinc certe inferre licet, hoc phaenomenon, in cerebro notatum, a sanguinis in cava ascendente ejusdemque ramis recurso, propter transitum ejus per pulmones difficilem, proficisci.

S E C T. V.

De Sanguinis in Foetu Cursu.

LVI. Foetus in utero gestati, et ab aëre externo exclusi, pulmones collabuntur. Sanguini vero per hos, quantitate parva tantum transeunti, natura, semper provida, aliud iter parandum curavit. Praeterea cum fluidum vitale ipse conficere nequeat, vias per quas illud a matre sua recipiat, adque eandem restituat, eadem benigna rerum creatrix quoque

* Cl. Cullen. Praelect. de medicinae institutis.

que comparavit. De varietatibus igitur in foetus systemate imprimis agetur; quibus rite expositis, modus, quo sanguis in eo circumferatur, facillime intelligetur.

LVII. Foramen ovale in medio auricularum cordis septo, valvula finistram versus porrecta, instructum, antea positum est (VII.); sed duo sunt quoque canales, statui foetus proprii, hoc in loco notandi, alter, nempe, ab arteriae pulmonaris (XV) initio proficiscens, qui in aortam (XV) definit, alter venae portarum truncum inter (XLIX) et cavam inferiorem (XII) sese extendens. Ille *ductus arteriosus*, hic *venosus*, appellatur.

LVIII. Haecenus de foetui propriis; nunc vero de quibusdam, huic cum utero matris gravido communibus, varietatibus dicendum est. Ad hujus visceris fundum, postquam mater concepit, substantia spongiosa et pervasculosa firmiter adhaeret, cui nomen est *placenta*, cujus vasa cum uterinis ubique communicant; arteriis hujus extremis illius venis respondentibus, illius vero arteriis in hujus venas hiantibus. De nexu hujusce-
modi

modi uterum inter et placentam nonnulli dubitarunt; cum vero clare ostendunt menses praegnantium suppressi; jactura sanguinis magna, placenta immature separata; aquae, argenti vivi, aliorumve fluidorum ex utero in placentam transitus; aliaeque compluria*.

LIX. Radices venarum placentae propriarum collectae in magnum desinunt truncum, *venam*, nempe, *umbilicalem*, quae fabrica cellulosa, tria in septa divisa, et membrana ab amnio † veniente, involuta, foetus umbilicum intrat, partemque funiculi praecipuam constituit, et ad venae portarum truncum (XLIX.) advenit.

LX. *Arteriae duae, umbilicales* dictae, ab iliacis internis originem ducentes, juxta latera vesicae urinariae utrinque ascendunt, et extra peritoneum sitae ex umbilico exeunt; exinde, vena umbilicali iis adjuncta, placentam uterinam (LVIII.) petunt, ubi multis ramulis

* Vid. Hall. Pr. Lin. Physiol. DCCCXCI.

† Foetus in utero duobus tegitur involucribus, quae placentae superficiei adnectuntur; horum amnion interius est.

mulis perexiguīs finiuntur. Varietatibus hoc modo percursis, ad motum sanguinis ipsius in foetu referendum progrediemur.

LXI. Sanguis ad placentam (LVIII.) per systema matris arteriosum adductus a bibulis venarum umbilicalium (LIX) ostiis absorbetur, adque venae portarum truncum (XLIX.) transmittitur; ibi in duas partes dividitur. Dimidium ejus unum per hepar transit, et inde per venas hepatis proprias ad cavam reddit; alterum vero per ductum venosum (LVII.) directe ad cavam mittitur, ex qua in auriculam cordis dextram pervenit. In hanc receptus aequalem subit iterum divisionem; pars, nempe, dimidia aut circiter per foramen ovale (VII. et LVII.) in auriculam sinistram ventriculumque ei respondentem propellitur, et deinde ex hoc in aortam devehitur; pars altera in ventriculum dextrum arteriamque pulmonarem urgetur. Quantitas ad hanc allata ex aequo quoque dividitur; portio una in pulmones, e quibus ad auriculam sinistram reducitur, altera per ductum arteriosum (LVII) in aortam transit. Ab aorta sanguis
cursum

cursum ad iliacas internas atque umbilicales (LX.) tenet, haeque ad placentam (LVIII.) eum devehunt, cujus ab venulis absorptus ad matris systema reducitur.

LXII. Ex his consideratis aperte patet,

1mo, Sanguinem matris arteriosum in foetu venosum, hujus autem venosum in illa arteriosum fieri ;

2do, Partem totius sanguinis quantitatis quae a matre certo tempore ad foetum transmittitur, dimidiam solam recta ad cor referri, et quartam tantum per pulmones transire.

LXIII. Foetu in lucem edito, spiritu semel tracto, circuitus variatur, et cursum generalem, quem supra retulimus, sanguis sibi statim assumit. Ductus arteriosus venosusque (LVII) inutiles facti, cavis suis deletis, in ligamenta mutantur ; atque copia sanguinis a quarta ad partem dimidiam usque adaucta per pulmones nunc fluit, eodemque tempore, quo in auriculam dextram cavae sese exonerant, sinistram auriculam ingreditur. Ambae igitur auriculae in posterum simul agunt, atque

que sanguis e dextra ad sinistram una cum ea
constrictam non potest urgeri. Hanc ob
causam fossa ovalis, vestigio suo tantum re-
manente, quoque occluditur.

C A P. IV.

C A P. IV.

DE VIRIBUS SANGUINEM MOVENTIBUS.

LXIV. Cursu sanguinis per cava ad eum circumferendum destinata generali, et quibusdam, quae in eo incidunt, varietatibus, ut potuimus, explicatis; de viribus hanc summi momenti functionem peragentibus, fluidumque vitale, corpus in universum diffundentibus, proxime differendum est. De causis igitur cor perpetuo moventibus, et sanguinis per vasa cursum facientibus, deque ejus per pulmones transitu agemus; postremo vero, utrum aliquid auxilii necne a principio ipsius vitali sanguis in circuitu suo accipere possit, quaeremus.

S E C T. I.

De Cordis Actione ejusdemque Causis.

LXV. Inter omnes, quae sanguinis motum per corpus faciunt, potestates, cor primum

mum sibi vindicat locum, et unica ejus causa fuisse a quibusdam fuit existimatum. Hanc opinionem postea refellere conabimur *. Quid autem efficiat ut hoc organum, vita subsistente, haud unquam agere cesset, hoc in loco pro virili contendemus investigare. De hac re igitur physiologica, quae magni certe momenti est, diversas auctorum opiniones excutere, eamque, veritati quae proxima esse videatur, firmare studebimus: Quod enim amplius a tyrone expectandum? Homines tantum annorum complurium experientia doctos, judicioque acri praeditos, nova proponere decet; nec ea, nisi rebus certis multisque experimentis suffulta, alii pro veris recipere debent.

I. *De opinione Antiquorum, &c.*

LXVI. Opinio fuit veterum, vim cordis ipsius vitalem motum ejus perpetuum facere; postquam autem ubique fere concess-

F

sum

* Vide Sect. hujus capitis sequentem.

sum est, Harveium illustrissimum sanguinis circuitum ex toto exposuisse, systole cordis aliorum muscutorum contractionem referre putabatur, a quibus hoc tantum differre videbatur, quod motibus alternis semper agitatatum fuit. Hujus igitur actionis continuæ caulis physiologi complures studuerunt, et in multas super ea sententias omnino diversas concesserunt.

LXVII. Nervos tubos cavos fuisse fluidum (spiritum nempe vitalem) continentes, quod in cordis fibras alternis vicibus est ingressum, vel quia valvulae quaedam progressum ejus æquabilem impediabant, quodve tam subtile erat tubi cavum, ut tantum guttatim effluere potuerit spiritus, posuerunt nonnulli. Haec autem opinio revera est hypothetica, nec argumentis sustentata, nec experimentis innixa. Nullus enim anatomicus valvulas nervorum adhuc demonstravit, fluidumve per illos transire rite probavit. Hanc igitur refellere conari, meo quidem judicio, foret supervacaneum.

LXVIII.

LXVIII. Multae aliae fuerunt opiniones, quae sensui communi repugnarunt, et argumentum nullo modo illustrarunt. Igitur mihi in animo est eas silentio praeterire, et reliquis virorum, qui artem Hippocraticam hoc seculo ornaverint, propriis, investigationem meam circumscribere, Boerhaaviana, nempe, De Gorteriana, et Whyttiana.

2. *De opinione Boerhaaviana.*

LXIX. Vir hicce jure celeberrimus, omnium medicinae institutorum peritissimus, fluidum nervosum in musculorum fibras ingrediens, exque illis egrediens, pro vera eorum actionis causa habuit; deque cordis motu agens, sequentia memoriae prodidit:

‘ Verum in omnes musculos totius corporis
 ‘ simul contingens aequabilis ille influxus,
 ‘ tum temporis in cor contractum influere
 ‘ non potest, sed in nervis ejus aggeritur;
 ‘ unde hoc per auriculas, venam cavam, et
 ‘ pulmonalem in cavitatibus; per arterias
 ‘ coronarias in substantia; per nervos in vil-

‘ lis

' lis musculosis impletum ; uno momento
 ' violentissime contrahitur : Mox vero san-
 ' guis venosus interea copiose et velociter,
 ' advectus in auriculas et in sinus venosos,
 ' fortiter horum parietes distendendo, com-
 ' primit nervos cardiacos, juxta horum late-
 ' ra distributos, dum et illi nervi cardiaci,
 ' qui juxta aortam et pulmonalem arteriam
 ' in cor tendunt, simul quoque his expansis
 ' per repletionem, quoque comprimuntur ;
 ' ergo cor fit paralyticum, et laxatum ite-
 ' rum impletur ; quo ipso cardiaci omnes
 ' nervi, liberi iterum, simul cor contrahunt,
 ' ficque alterne semper id et agit et quiescit *.'

LXX. Huic ratiocinio, quamvis ingenioso,
 multa objici possunt ; pauca vero tantum e-
 orum hic referre decrevimus.

Imo, Omnes nervos cardiacos (prout Bo-
 erhaavio placuit) auriculas inter et arterias
 magnas esse sitos, ex observatione anatomi-
 corum minime apparet ; duos enim esse ner-
 vos haud parvae magnitudinis, qui, cum a-

liis

* Boerh. Institut. Med. No. 409.

liis minoribus, cursum alium tenent, manifestum est. Hoc vero nervorum situ concessio, arteriae atque auriculae adeo magna adipis copia circumdantur, ut nervos non comprimere valeant.

2do, Nervos per arteriarum diastolen compressos, si situs eorum, supra positus, verus foret, paralyfin cordi non valituros esse inferre, ex analogia plane constat; aneurisma enim, prope nervum ortum, non motum partibus, quae ramulis hujus sunt instructae, demit. Insuper, nervi intercostales, licet arteriarum carotidum pressurae objiciantur, vi sua excitante, diastole harum substante, non orbantur; partes enim quas petunt paralyfi non tentari consueverunt. Ad verba Morgagni illustrissimi super hac re decurramus: ‘Qui
 ‘ fit,’ inquit ille, ‘ ut nervi incoctalis munera
 ‘ ab assidua arteriae carotidis pulsatione non
 ‘ turbentur, praesertim cum is nervus non
 ‘ possit cedere, sed communis ipsi et arteriae
 ‘ ossei foraminis parietibus allidatur? Qui
 ‘ fieri possit, ut in Veneta muliere, quam cum
 ‘ amicis dissecuimus, cum arteriae subclaviae
 ‘ sinistrae

‘ sinistrae superiores posticque parietes in a-
‘ neurisma expansi, duos treise nervos ex iis
‘ qui ab inferioribus cervicis vertebrae ad bra-
‘ chium descendunt, nulla prorsus interposita
‘ re, contingerent; qui fieri, inquam, posset
‘ ut nulla tamen debilitas, nullus torpor in
‘ eo brachio fuit animadversus *?’

3tio, Compressio nervi quolibet alio modo facta, non statim paralyfin, sed sensum quendam ingratum prius excitat; et pars, pressura amota, gradatim, non subito, statum pristinum sibi recuperat.

4to, Cum auriculae et ventriculi ab eadem origine nervos deducant, eodem tempore constringi et laxari debent; contra vero notatum fuit (XXXVII.), motum unius motum alterius praecedere, et hanc actionem alternam theoria Boerhaaviana explicare nequit; auriculae enim agunt, dum liquoris nervosi in eas ingressum dilatione sua impedire debent.

5to,

* Morgagn. adversar. anatom. vi, 24.

5to, Observationes Harveii huic opinioni adversantur; dicit enim ille, ‘ Primus omnium definit pulsare sinister ventriculus; deinde ejus auricula; demum dexter ventriculus; ultimo, reliquis omnibus cessantibus et mortuis, pulsat usque dextra auricula, uti ultimo in dextra auricula vita remanere videatur †.’ Hinc motus cordis alternos non ab ejus nervorum compressione pendere, plane apparet; postquam enim sinister ventriculus movere cessavit, aorta sanguine non impleri potest, auriculaeque sinistrae motu proxime sublato, nervi ab hac comprimi nequeunt.

Alia quoque argumenta contra hanc doctrinam adferre possumus; sed temporis satis superque forsitan in ea jam consumpsimus.

3. *De opinione De Gorteriana.*

LXXI. Huic viro erudito theoriae Boerhaaviana defectus plane apparuit, et alteram stabilire conatus est, cui, me judice, plura obijci possunt. Primum observat, motus omnes
vitaes

† Harv. de motu cord, &c, cap. iv.

vitales ab eadem causa pendere; remque ita sese habere, mihi verisimile videtur. Sed ejus de hac causa opinioni nequaquam assentiri possum: Musculis enim, quibus motus vitales perficiuntur, structuram esse singularem existimat, adeo ut fibrae, cum spiritu vitali implentur, fibrillas nervosas comprimant, fluidique ex his in illas transitui obstant; quam ob causam laxari incipiunt muscoli, et cavis nervorum, pressura amota, sic apertis relictis, fibras iterum ingrediuntur spiritus vitales, easque ad actionem iterum movent*.

LXXII. Non opus est, uti multis hanc hypothesein refellamus. Perpaucas igitur observationes, quae ei adversantur, proferemus.

Imo, Neutiquam ex anatomicorum observationibus apparet, musculos motibus vitalibus inservientes structuram ab aliorum diversam habere; illos autem, contra, ejusdem esse indolis, omnibusque iisdem proprietatibus esse praeditos, verisimilius videtur. Si
haec

* De Gorteri de mot. vital. sect. 39.

haec autem musculorum omnium structura foret, totum corpus animale, spiritu vitali eorum fibras alternatim ingrediente et egrediente, convulsionibus agigaretur.

2do, Motus omnes vitales, si vera esset theoria, eodem temporis puncto, officiis suis fungerentur; rem vero sese aliter habere omnibus in medicina versatis notum est. Intervallis enim brevioribus alii, longioribus alii eorum muscoli relaxantur et contrahuntur; et praeterea etiam nonnulli ex his motibus voluntati parent, velut functio respirationis, quam modo omnino suppressere possumus, modo contra, si plenam facere inspirationem opus sit, musculos, qui ad illam faciendam non natura conferunt, in auxilium nostrum vocare valeamus.

3tio, Experimentum clarissimi Halleri huic opinioni adversatur. Incidit enim ille venas cavas, et ne laxitati fibrarum tribui posset quies, partes quoque versus cor resectas ligavit, viamque sanguinis ad dextrum cordis latus hoc modo sustulit; quo facto, notavit, dum auricula sinistra ventriculusque ei respondens more usitato agerent, dextrum cor-

dis latus quiescere, nisi quod hujus ventricul-
lum, per fibras septi musculares utrique com-
munes, in aliquam officii societatem traheret
dexter ventriculus *. Hoc in experimento
non ligati fuerunt nervi ; igitur spiritus vi-
tales in utriusque cordis lateris fibras, uti sole-
bant, intrare poterant : Qui fit igitur ut unum
latus agere pergeret, alterum cessaret, nisi
quod, ut mox dicetur, sanguinis in cordis
cava ingredientis stimulus admotum illius
excitandum pernecessarius esset ?

LXXIII. De hac hypothese satis jam ver-
borum factum est, et de alia opinione a Ro-
berto Whyttio, olim hujus almae Academiae
Professore eximio, omniumque ad rem me-
dicam spectantium perito, pauca dicere ag-
grediemur.

4. *De Opinione Whyttiana* *.

LXXIV. Ab experimentis discimus cor,
stimulis applicatis, eodem modo, quo alios
musculos,

* Haller. Opera Minora, vol. 1.

† Vide Whytt's Essay on the vital and involuntary
motions, &c. sect. 3. and 4,

musculos, affici; quinetiam, si ad sanguinis circuitum considerandum animum appellamus, actionem illius organi simplicem esse inveniemus. Natura enim simplicitate in omnibus suis operibus gaudet. Cum sanguis a corpore universo revertens in auriculis accumulatur, hae statim contrahuntur, eumque, hoc modo, in ventriculos impellentes, laxari incipiunt, fluidoque a venis magnis ruente impleri iterum paratae sunt. Ventriculi, interea, eodem sanguine quoque distenti, magna vi agunt, eumque e seipsis expellunt, deinde etiam relaxantur, donec undae sanguinis novae in eos rursus urgeantur.

LXXV. Ex his apparet, quod cava cordis, simul ac sanguine implentur, constringuntur; eodemque expulso, statim relaxantur; unde hoc fluidum cor ad motum excitare cogere possumus, et ab Halleri experimento novissime relato (LXXII. 3.) eum non tantum necessariam, sed unicam esse causam, verissimum videtur. Namque latus cordis dextrum, simul ac sanguinis ingressu orbatur,

tum,

tum, agere cessavit, dum alterum more solito fuit agitatum.

LXXVI. Sanguinis autem in cor ingressu, et ex eodem egressu, pro ejus actionis causa habitis, quaestiones duae perdifficiles sese nostro examini subjiciunt.

1mo, Num sanguis irritatione sibi propria, tantumve cordis fibras distendendo, iis fit stimulo?

2do, Num fibrae, vi sola sibi inisita, animaeve interventu, seipsas hoc stimulo liberare conentur?

De his utrisque certatum est; et igitur de singulis ordine dicemus.

LXXVII. De prima quaestione (LXXVI. i.) acriter inter auctores disceptatum est, quorum alii fibris a sanguine ipso stimulatis cordis contractionem tribuere volunt; alii vero illum hunc motum facere posse omnino recusant, et sanguinis momento ex toto referendum esse contendunt. Argumenta ex utraque parte sunt valida. Hinc enim circuitus, ab exercitatione aliive causis majorem sanguinis copiam ad cor propellentibus, acceleratio, ejusdemque diminutio, ab haemorrhagiis

giis sanguinisve ullo alio modo jactura, oriunda, magnum pondus habent; illinc pulsus frequentes in quibusdam febrium generibus in quibus tardus est circuitus, et stimulorum potestas in fibris cordis constringendis, summa attentione digna sunt.

LXXVIII. Ad opinionem eorum, qui sanguinis impulsui cordis fibras distendenti actionem hujus tribuunt, stabiliendam non parum confert experimentum, cujus Lowerus est auctor, quod magni momenti esse videtur, quodque igitur ejus verbis referam: ‘Sanguinem e vena jugulari canis, fere ad totius massae dimidium detraxi, injecta per vices in venam cruralem pari cerevisiae cum paucis vino mixtae quantitate, et hoc alternis vicibus toties repetii, donec loco sanguinis pallidior solum tinctura loturae carniū, aut Clareto plurima aqua diluto, similis e vena proflueret. Corde interim de pulsu pristino paululum tantum remittente, adeo ut canis totum fere sanguinem cum cerevisia, priusquam

‘quam vitam cum morte, commutaret *.’
Nonne motus cordis, hoc in experimento, sanguine animalis fere toto effuso perstans, a fibris cordis fluidi distentione stimulis proficisci videtur?

LXXVIII. Argumenta equidem utrinque adhibita (LXXVII.) vim adeo aequam habent, ut momentum sanguinis cordis ipsius fibras distendens, stimulumque a fluido hoc ortum, ad ejus actionem movendam, mutuo conferre, non concludere non possimus; alterum vero sine alterius ope aliquando sufficere credibile quoque esse videtur; hoc modo igitur controversiam dirimendam putamus.

LXXX. Quaerunt autem nonnulli, qua in sanguinis parte invenienda sit stimulandi potestas? Neque enim gustui ingratus est, neque oculis omni alia fere corporis parte irritabilioribus admotus vim hujusmodi habere videtur. Huic quaestioni facile respondetur; partes enim aliae stimulis aliis afficiuntur. Namque, oculis exceptis, nulla corporis

* Lower de corde, edit, ante citat. p. 74.

poris pars luce irritatur ; multaque sunt alia hoc genus exempla. Et praeterea motus velocitate, salibusque quibus abundet, aequae ac calore quo praeditus est, sanguinem cordi stimulo esse posse, certe non improbable videtur.

LXXXI. De quaestione quoque secunda (LXXVI. 2.) auctores inter se maxime differunt. Dum enim Hallerus, aliique viri eruditi, cordis actionem facultati insitae tribuunt, alii haud famae minoris, talem in ejus fibris vim inesse, omnino negant. Omnia illorum argumenta hic excutere, hujus dissertatiunculae limites longe excederet. Id igitur, a quo hanc opinionem praecipue deducunt, tantum memorabo.

Contenditur, cor ex animalis moribundi corpore evulsum multas post horas a stimulis posse irritari. Hoc autem non cordi soli, sed musculis motui voluntario inservientibus quoque proprium est, ut viri jamjam memorati experimenta vim insitam, cujus praecipuus est fautor, stabiliendi consilio instituta satis clare ostendunt. In his autem experimentis hoc notabile

bile est, quod irritamenta, quibus usus est, ad musculos solos applicata fuerunt, nervis ad eos tendentibus omnino neglectis. Vir autem ingeniosus, qui paucos abhinc annos hac in alma academia lauream Apollineam sibi adeptus est, multa cum feliciore successu fecit pericula, quae litem ex toto dirimere videntur. In omnibus enim stimuli, cum ad musculos ipsos e corpore excisos, tum ad nervos ad eos pertinentes, fuerunt applicati, atque effectus eisdem semper secutos esse observatum fuit; musculis in utroque casu ad actionem excitatis. Stimuli vero nervis admoti, et eos non amplius irritare valentes, vim quoque musculos, quamvis his accurate applicati, contrahendi in posterum ex toto amiserunt.

Auctor igitur eruditus inde conclusionem subsequentem jure deducit. ‘ Ex his experimentis haec fere licet colligere; nimiam ab iis omnibus, quibus vis musculorum afficiatur, pariter affici vim nervosam; nullumque igitur has inter verum legitimumque interesse discrimen: Eam, qua motus muscularis proxime cietur, vim insitam
‘ male

male audire; quoniam ejusdem penitus
naturae est ac ipsa nervis per totum suum
cursum vis insidens: Nullam aliam mus-
culo inesse vim irritabilem, seu, quod aliis
fortasse magis arrideat, vim vitalem, seu
demum vim muscularem, praeter ipsam
vim nerveam: Motum denique muscula-
rem a vi nervea, tanquam a proxima sua
causa, nunquam non pendere; neque hu-
jusmodi actionem pro principio animali
habendam *.

Nos igitur quoque concludere fas est, vim insitam nihil aliud esse quam potestatem nervosam, quae post mortem in aliquantum temporis in fibris muscularibus remanens, earum actionis in causa est; ideoque hanc vim nervosam, etsi a cerebro originem ducat, aliquamdiu sine commercio cum eo existere posse.

LXXXII. Ex his quoque apparere videtur motum cordis, non sine animae sentientis interventu, a stimulis posse excitari. Hujus

* Vide Smith, Tent. Inaug. de actione musculari,
Anno 1767. edit.

jus autem facultatis sentientis sedes est encephalon, a quo nervi oriuntur.

LXXXIII. Objicietur forsitan huic opinioni, hujuscemodi in cor imperii haud consciam esse animam, illiusque igitur actiones non regere posse. Omnibus vero notum est, quod impressiones quaelibet per consuetudinem potestatem sensationes excitandi amittunt, quodque multos inscii perficimus motus voluntati subiectos. Cum igitur stimulo ad cor applicato a partu usque sumus assueti, eum attentionem nostram fugere non mirabile. Per consuetudinem quoque motus omnes stabilitatem sibi acquirunt, unde non mutari possunt. Cullenus, praeceptor noster celeberrimus, cor sub vitae initium voluntati paruisse, aliqua ex parte probabile putat *. Utrum vero res ita sese necne habeat, non tyronis est dijudicare.

S E C T. II.

De Causis Sanguinem in Arteriis moventibus.

LXXXIV. Cor solam fuisse causam, quae sanguinem

* Cull. Materia Medica, 4to, pag. 28

sanguinem in corpus diffundat, uti alibi diximus (LXV.), nonnulli putarunt; cum vero sequentia in animo versemus, id per se sufficere concedere non possumus.

LXXXV. Velocitas qua sanguis e sinistro cordis ventriculo profluit, e quantitate ejus systole hujus unaquaque in aortam propulsa, ex aortae lumine, et e tempore quo singula cordis systole perficitur, aestimari potest; sed horum nulla comperta habemus*. Certissimum autem est, quod sanguis per arterias fluens multis remorae causis objicitur, suaeque velocitatis, quatenus a corde pendet, multum amittit; si enim illum in arteriis majoribus minoribusque microscopio contempleris, in his quam illis multò lentius moveri eum videbis. Praeterea, quoque chirurgis notum est, quod quo longius arteria vulnerata a corde distat, eo citius sanguinis ex ea profusio supprimitur†.

LXXXVI.

* Cull. Instit. CLIX.

† De hac re verba sequentia habet Hallerus. ‘ Ex parvo ramo, dum vicinus sit cordi aut aortae, longe periculosius

LXXXVI. E causis sanguinem tardantibus praecipuae sunt sequentes :

1^{mo}, Cava arteriarum, quo magis a corde recedunt, eo magis ampla ;

2^{do}, Crebrae earundem inflexiones ;

3^{tio}, Anguli, quos ramuli cum truncis se dimittentibus faciunt ;

4^{to}, Anastomoses ;

5^{to}, Sanguinis visciditas ;

6^{to}, Partium circumdantium rigor et pondus *. De singulis pauca dicemus.

LXXXVII. Lumina arteriarum, quo longius a corde distant, eo majora evadere (LXXXVI.) ab omnibus conceditur ; sed rationem qua crescunt, quanquam multi super hac re calculum subducere conati sunt, comperire difficile ; etenim omnes inter sese differunt. Non quidem multum refert : Cum enim ramorum areas, quam trunci, ampliores esse, pro certo noverimus, plus sanguinis

* periculosius sanguis erumpit, quam in majori et remotiori arteria, chirurgicorum experimento. Prim. Lin. Phys. CLXII.

* Cull. Instit. CLXX.

guinis ad illos dilatandos necessarium esse, fluidumque in illis, quam in his, lentius fluere evidens et manifestum.

LXXXVIII. Arteriarum inflexiones (LXXXVI. 2.) et anguli, quos, quantum truncos suos spectat, ramuli faciunt (LXXXVI. 3.), eadem ratione sanguinis velocitatem imminuunt; namque vim fricationis, partiumque vicinarum, resistantiam ambo adaugent. Sic in tubis rigidis, quo majoribus angulis rami a truncis divergunt, eo magis fluidorum per illos profluentium motui resistitur. Atque in motu communicando perpetuum est in vicinis obstaculis removendis dispendium aliquod; hinc quoque igitur sanguinis retardatio consequitur.

LXXXIX. Arteriarum anastomoses (LXXXVI. 4.) praecipuum esse sanguinis remoramen manifeste apparent; et mirabile est, nullum ante Hallerium, quem secuti sunt Cullenus illustris aliique famae magnae, hoc notasse physiologum. In ramulis enim sibi invicem adjunctis a ramis diversis orientibus, sanguis huc illuc adeo urgetur, ut altera
unda

unda alteri occurrat, causamque retardationis magnam certe praebeat.

XC. De sanguinis visciditate (LXXXVI. 5.) nil dubitandum superest; namque nisi vasorum actioni subjiciatur hoc fluidum, sponte concrefcit. Quomodo insuper haec ejus proprietas velocitatem suam imminuat, clare constabit: Particulae enim sanguinis adeo in vasis circumvolvuntur, ut adhaesionis frictionem necessario efficiant, ad quam augendam viscositas modo sequente confert. Fluidi cujuslibet viscidi particulae inter se arcte cohaerent; et potentius a materia qualibet alia attrahuntur*. Sanguis igitur, quo magis viscidus est, eo magis ad vasorum parietes adhaerebit, eoque magis partium divisioni, quam eum subire oportet cum e trunco in ramulos transit, obsistet.

XCI. Unaquaque cordis systole arteriae dilatantur, partiumque iis incumbentium
pondus

* Particulae gummi Arabici ex aqua soluti non solum adeo fortiter cohaerent, ut aegre divisibiles sint, sed lignum majore, quam aqua ipsa, gradu quoque attrahunt.

pondus (LXXXVI. 6.) movent; haeque partes adeo sunt rigidae, ut sanguinis velocitati necessario resistent. Aliter quidem cenſet Hallerus eruditus: ‘Pondus,’ inquit ille, ‘incumbentis atmosphaerae, muscutorum et ‘carnium arteriae incumbentium, vis ejus ‘contractilis resistunt equidem cordi; caeterum velocitatem sanguinis non minuunt; ‘tantundem enim reddunt in cordis diastole, ‘quantum systoles tempore de ejus viribus ‘dempserunt *.’ Solummodo autem est corporum elatere praedictorum tantum potestatis viribus distendentibus resiliendo admoveere, quantum hae in illis distendendis amiserant; et quamvis aërem elasticum esse concedimus, partes reliquas tamen arteriis proximas elatere ex toto carere contendimus.

XCII. Ab omnibus his causis (LXXXVII. —XCI.) sanguis in arteriis profluens multum retardatur; et ex calculis a Keil subductis comperimur, quod sanguinis velocitas in arteriis extremis multo major est, quam ejusdem

* Hall. Prim. Lin Phys. CLXII.

dem e corde ruentis, tot remoraminis causis objecta, posset praeberere. Igitur alias esse potestates, quae motum sanguinis a corde inceptum continuant, jure concludimus; easque in articularum ipsarum actione consistere compluria argumenta ostendunt, quibus sequentia annumeranda sunt. Ad idem quoque probandum confert observatio Harveiana olim posita (LXXV.); nam, si actioni cordis soli sanguinis motus deberetur, quibus potestatibus eum ad auriculam dextram reductum, cum ventriculus sinister laborare cessavit, tribuere possemus? Quibus, inquam, nisi vasorum actioni? Unde igitur arteriae vim sanguinis promovendi deducunt, proximum est ut quaeramus.

XCIII. Arterias elasticitatem habere (XXIV.) inter omnes convenit: Haec autem ad sanguinem percitandum nihil vel paulum valet; namque corpus elasticum, quanto vi aliqua extenditur, tanto, nec amplius, resilit. Ita si pondus funem, cui appendatur, ad digiti longitudinem augeat, pondere amoto, digito tantum brevior fiat. Hinc patet arterias,

terias, elatere suo solo, tantum virium in sanguinem exercere valere, quantum potestatis cordis hic suum per impulsum eas * dilatando amittit. Praeterea, arteriae in corpore vivo ad contenta sua, quamvis uno tempore sextuplo plus quam alias contineant, adeo sese accommodant, ut plenae et cylindricae semper appareant. Hoc, vi resiliendi sola, non facere valent; namque arteria nulla e-mortua semunciae fluidi capax, unciae capax reddi potest, neque tam multo sese elatere constringunt, ut drachmas duas undique ex aequo comprimant. Contra, arteriae animalis jam vita defuncti inspectae, etsi quantitas sanguinis in illis vita fruentibus neutiquam imminuitur, inanes † reperiuntur; quia prin-

I

cipio

* Georgius Fordyce medicus et physiologus ingeniosus haec tradidit verba: ‘ If the arteries contracted and dilated by their elasticity, no additional force could be applied from their contraction and dilation, since the heart would lose more force in distending the arteries than they would reapply to the blood in contracting.’

Elements of the Pract. of Phys. Part. I. p. 70.

† Vas sanguiferum vocamus inane, cum fluidum contentum id non adeo dilatat, ut cylindri speciem induat.

cipio vitali illas ad contenta accommodante omnino sublato, ad diametron, quam illis conciliat mera vis elastica, statim reducuntur, eodem modo, quo tubus e corio elastico confectus, et fune stricte succinctus, hoc inciso, resilit. Ad sanguinem igitur circumferendum arteriarum elaterem haud conferre apparet; et sequentia phaenomena, quae vim contractilem corpori vivo propriam illis inesse ostendunt, hoc magis magisque firmant.

XCIV. Arterias fibris esse praeditas, quas anatomici tunicam muscularem appellarunt, inter has describendas retulimus (XXI.). Quod autem pallidiores sunt fibrae magisque, quam musculorum, densiores, nonnulli, inter quos eminent Hallerus et Nichols, eas naturae ligamentosae vel tendineae magis quam muscularis esse participes, contendunt, Huic vero objiciendum est, quod fibrae arteriarum in spiram per totum suum decursum adeo torquentur, ut, si eas totas inspicias, circulum formare videantur; et cum talis ligamenti vel tendinis textura in nulla corporis parte detegatur, fas est structuram
potius

potius muscularem esse suspicari. Probabiliorem adhuc opinionem nostram reddit analogia intestinorum fibrarum, quas nemo in muscularium numerum recipere hactenus dubitavit. Praeterea quoque notandum est, quod in secandis phthisi defunctis manifesta est in arteriis fibrarum muscularium species; namque membrana adiposa iis ubique intertexta hoc morbo adeo consumpta est, ut earum, aequae ac aliorum musculorum, fibrae conspicuae evadant.

XCV. Caeterum arteriarum fibras muscularium speciem induere non satis est probare; sed irritabilitate musculis propria quoque praeditas esse ostendamus oportet. Hoc imprimis ab experimentis Verschuirianis * et Dennisonianis †, medicis ingeniosis, discimus. Ille multa fecit pericula quae hoc in loco enumerare, cum ab ipso in lucem edita sint, supervacuum foret; sat erit dicere,

* Vide Verschuir. dissert. de arteriarum et venarum vi irritabili, &c.

† Vide Dennison, dissert. inaug. de vasorum irritabilitate, anno 1775, edit.

cere, plurima eorum adeo prospera fuisse, ut de hac re nil dubii reliquerint. Hic quoque quatuor tentavit experimenta, unde idem omnino cogi potest.

XCVI. Alia quoque arteriarum actionem firmanant; ut,

Imo, Momentum sanguinis huc illuc directum, manente interea eadem cordis energia. In phlegmasiis topicis, aequae ac in haemorrhagiis, impetum sanguinis in vasis laborantibus augeri, nullum pathologorum adhuc latuit; cum vero nec aliae corporis partes similiter afficiantur, neque cordis actio ullo modo mutetur, actioni solummodo vasorum partis affectae adauctae congestio in illis, in his profusio sanguinis, tribui potest. Ad eandem rem quoque probandam facit facies subito rubore suffusa, qui pathemata animi quaedam, et pudoris praecipue sensum, semper fere comitatur.

2do, Phaenomena in secretionem glandulari occurrentia, quae vim nervosam arteriis inesse demonstrant. Sudore enim et perspiratione solis exceptis, nulla, ob adauctam
cordis.

cordis actionem, augetur secretio. Contra, vero stimuli glandulis ipsis applicati fluidi ex iis fluxum magnopere augent; et non solum materies acres faucibus admotae, sed cibus, gustui gratus, si in conspectum adducatur, vel in memoriam tantum veniat, salivae excretionem multo magis liberalem semper reddunt.

XCVII. Omnia haec vasorum irritabilitatem plane probant, utque in vasis extremis phaenomena supra relata (XCVI. 1. 2.) potissimum sese ostendunt; sic probabile quoque videtur, fibras arteriarum musculares, quo magis a corde remotae sunt, eo magis irritabiles fieri *.

XCVIII. Cordis et arteriarum vim ad vasa minutissima capillaria haud pervenire putavit Whyttius ingeniosus. Igitur haec motu oscillatorio, sibi ipsis proprio, et a potestatibus modo positis omnino diverso, praedita esse, monstrare pro virili conatus est †. Cal-
culos

* Cullen. Instit. Med. CLIX. sub finem.

† Vide Whytt's Physiological essays, I. sect. 2.

culos autem, quibus haec ejus opinio innitur, quamvis speciosos, non pro certis tamen habendos esse judicamus. Et ex conclusionibus aliorum longe alia effici possunt. Velocitas enim sanguinis in vasculis extremis, Culleno * teste, unaquaque cordis systole augetur; et Lewenhoeckius, aequae ac Halesius, ejusdem in venis impetum, substante quoque cordis systole, accelerari notarunt. Praeterea etiam observavit Hallerus, intervallum arterias inter rubras vasaque fecernentia haud adeo esse longum, quin materies quaevis tennes in illas injectae has intrare valeant. Igitur motu hujusmodi oscillatorio minime opus est, et opinio, ut ex toto hypothetica, cui fides habeatur non digna.

Idem de ejusdem viri doctrina †, vascula capillaria attrahendi vi praedita esse ponente, dici potest; eadem enim argumenta ex hujusmodi necessitate deducta iisdem rationibus facile refelluntur.

XCIX.

* Cl. Cull. Praelect. de Medic. Institut.

† Whytt, loco supra citato.

XCIX. Halerus viribus sanguinem in arteriis moventibus aliam addidit. Arteria vulnerata, sanguinem ab aliis ei vicinis, etiamque ab hac ipsa infra ostium, motu retrogrado, vulnus versus subito tendere conspexit. Hanc *vim derivationis* vocavit, eamque sanguinis motum adjuvare est opinatus; sed ad sanguinem propellendum, me iudice, parum confert. Namque arteriae, Hallero ipso testante, semper sunt plenae et sanguine distentae, et in hoc plenitudinis universae statu, si unum vas relaxatur, sanguis per vicinorum contractionem ad hoc haud dubie propelletur. Igitur tantum a vasorum vim contractilem habentium plenitudine *vis Halleri derivationis* proficisci videtur.

S E C T. III.

De Causis Sanguinem in Venis moventibus.

C. Sanguis in venis per cordis et arteriarum actionem quodammodo promoveri videtur;

detur; namque, ligatura arteriae injecta, humor in venis vicinis progrediens stagnat. Vires autem hoc genus tot impedimentis (LXXXVI.—XCI.) objectae multum imminuuntur, praecipue in capillaribus, ubi obstacula augentur, ut experimentum simplex testatur: Tubo enim altero in arteriam, altero in venam ejusdem amplitudinis inserto, sanguis in illo sexdecies quam in hoc altius ascendit. Si igitur sanguis in venis extremis tam multum velocitatis suae amittit, aliis viribus ad eum in majoribus ascendentem movendum opus esse, nihil obstat, quo minus affirmemus.

CI. Venas valvulis esse praeditas alibi (XXVIII.) notatum est. Hae sanguinis cursum ad cor dirigunt, undamque ejusdem praecedentem adeo sustentant, ut alteri succedenti minus obfistatur. Musculorum quoque actione sanguis duplici modo in venis promovetur; illi enim inter contrahendum vasa per suas fibras transeuntia, totiusque suae molis auctu venas vicinas comprimunt, omnisque

omnisque pressura in venas facta, ob valvularum structuram, sanguinem cor versus propellit.

CII. Cordis igitur et arteriarum (C.), musculorumque circumjacentium actio, et valvularum auxilium (Cl.), sanguinis in venis motrices sunt potestates. Quinetiam vero verisimile est, actione sibi ipsis propria sanguinem per eas quoque moveri. In cavis etenim venisque pulmonalibus fibrae sunt conspicuae, et in his aequae ac in illis multae contractiones observarunt *. Auriculae dextrae motum ultimo cessare Harveius notavit (LXX. 5.) ; et, hac ipsa quoque quiescente, venas cavas contractionibus alternis agitari Whyttius clarissimus vidit †.

K

CIII.

* Vide Dennison, Dissert. nuper citat. cap. III.

† Vide Whytt's Essay on vital and involuntary motions, &c. in multis locis, et ejusdem Physiological essays, ubi haec habet verba : ‘ Not only the auricles and ventricles of the heart, but the trunks of the *venae cavae* adjoining to the right *sinus venosus*, are continually agitated with alternate contractions. The trunks of the *venae cavae* preserve this motion in animals newly dead, some time after the pulsation of the heart has ceased ;
but

CIII. Ad venarum autem irritabilitatem illustrandam et probandam potissimum conferunt Verschuirii experimenta, de quorum quarto haec verba tradidit : ‘ Variis arteriis et venis frustra irritatis, aggressi fumus pectoris contenta; elegans spectaculum praebebat vena cava utraque, contractione sua sanguinem vere in cordis sinum perpellens; manifestus id erat quando cordis actio jam cessare incipiebat; quandoque sua contractione, sanguinem impellens in cordis sinum, ejus motum resuscitabat. Ut plane convicti essemus motum illum a corde non pendere, quanquam illud minime appareret, ligavimus filo venam cavam utramque, et cor forfice sustulimus; nihilominus motus ille et contractio saepius adparebat,

‘ but no sooner is the blood contained in these vessels evacuated, and new supplies intercepted by ligatures, than their fibres collapse, and remain without motion. Hence we are led to conclude, that the alternate contractions of these veins are, like those of the heart, owing to the blood acting upon them as a stimulus.’ Essay I. sect. II.

‘parebat, et ad irritationem ferro factam
 ‘conspicua erat; per quadrantem horae et
 ‘ulterius, illa utraque vena cava hanc vim
 ‘retinuit; nonnunquam, imprimis in initio,
 ‘similis etiam modus adparebat in vena
 ‘azygo. In hoc experimento vena cava
 ‘diuturnitate superavit cordis irritabilitatem,
 ‘nisi simul eo fecerit, quod illud de reliquo
 ‘corpore separavimus*.’ Hinc venas irri-
 tabilitate aequae ac arterias, quanquam gradu
 minore, praeditas esse, asserere non dubito.

S E C T. IV.

*De Causis Sanguinem in Pulmonibus moven-
tibus.*

CIV. Aëris in pulmones admissionem, et
 ejusdem ex iis expulsionem ad sanguinem
 per eos movendum, necessarias esse hinc ma-
 nifestum, quod in foetu utero gestato, ubi
 semper collabuntur, adeo involuta sunt vasa, ut
 quartam

* Vide Verschuir. Dissert. ante citat.

quartam sanguinis a matre adducti partem solam admittere valeant. Post autem partum, spiritu semel tracto, totius sanguinis massa dimidium per ea uno tempore semper transit. Praeter causas igitur reliquas sanguinem in corpus universum diffundentes, cordis, nempe, et arteriarum actionem, venarumque forsitan irritabilitatem, respiratione, uti per pulmones transmittatur, quoque opus est. Modo sequente hujus necessitas exponi potest.

CV. Aëre in pulmones admissio, vasa evolvuntur, perque ea sanguis libere transit. Sin autem respiratio plena sit, vel justo diutius contineatur, pulmones nimis dilatantur, adeo ut vasa sua comprimant, sanguinisque cursum impediant. Quam ob causam exspiratio, ejusdemve aëris expulsio fit pernecessaria; qua denique peracta, vasa iterum complicata ad aërem rursus trahendum animal impellunt. Ex his sanguinem, in statu tantum inspirationis, aequae ac expirationis, certo libere per pulmones transire, et sub finem
utriusque

utriusque transitum ejus impediri, abunde constat.

S E C T. V.

De iis, quae, utrum aliquid ad Sanguinem promovendum, necne conferat principium ipsius vitale? demonstrant.

CVI. Inter vires sanguinem promoventes referendas, num sanguis ipse vita praeditus sit, atque per potestatem hujusmodi ad seipsum circumferendum ullo modo valeat conferre, non forsitan alienum foret inquirere; pauca igitur de hac quaestione addere decrevimus.

CVII. Conjecturam de vi sanguinis vitali primus in lucem edidit Harveius jure immortalis; sed omnino neglecta fuit opinio, donec paucos ante annos Joannes Hunterus, physiologus ingeniosus, multis argumentis, et quibusdam experimentis, eam stabilire conatus sit. Ex illo tempore multo magis agitata doctrina, nonnullis placuit, dum alii eam refellere

refellere studuerunt. In his meipsum esse confiteor ; et imprimis opinionem, quamvis ingeniosam, legibus oeconomiae animalis contrariam esse ostendere, deinde argumentis Hunteri validissimis quaedam objicere, conabor. Horum enim omnia excutere, tempus longius desideraret, et limites hujusmodi opusculi, ubi ratio brevitatis semper habenda, excederet.

CVIII. Per sanguinis vitam tantum intelligit Hunterus, cum proprietatibus illis, quae in fibris muscularibus ex animali adhuc vivente, vel statim post mortem, excisis apparent, similibus esse praeditum ; quas a nullo cum systemate nervoso commercio proficisci existimaverunt nonnulli, quorum aemulus est Hunterus. Hujus igitur doctrinae fundamentum est fallax ; vitam enim, vel cujuslibet partis irritabilitatem, a vi nervosa pendere supra (LXXXI) ostendere conati sumus ; et cum nervi ad sanguinem proficiscentes nunquam fuerint demonstrati, sanguinem hujusmodi energiam neutiquam habere, plane manifestum est.

CIX.

CIX. Medicus ingeniosus, mihi amicissimus, in hac urbe agens, artemque salutiferam multa cum laude exercens, observationem, quae ad hanc objectionem evertendam multum valere apparet, in medium protulit. Silentio igitur illam non praetereundam duco. Mihi vitam a cerebri energia originem ducere asserenti ex toto assentitur ; addit vero, si hujus functiones per fluidi electrici, vel per subtilis, opem exerçantur, corporis animalis tam fluida, quam solida, eo imbui posse *.

CX. Summa, qua decet, modestia, pauca huic argumento objicienda puto. Energiam nervosam a fluido corpus pervadente pendere prius agnoscamus, quam egregii viri sententiam consideremus, necesse est. Ille autem petit principium, cui cum rebus certis et multorum observationibus parum convenit. Contra hoc, argumentum unum e plurimis selegam. Energia cerebri a ligatura serica nervis injecta protinus et prorsus impeditur ;

* Duncan praelect. de Med. Theor. et Pr.

impeditur ; sed in experimentis, in fluidum electricum institutis, res aliter accidit ; vinculum enim sericum hoc fluidum facillime transmittit. Sin igitur in motibus voluntariis ciendis parum agat tam fugax et subtile fluidum, motus vitales, quibus sanguis certe, si vivat, annumerandus est, qui mentis arbitrio minime obediunt, hujus fluidi operationi non est cur tribuamus. Innumera quidem docent experimenta, humores animales fluidum electricum quam optime deducere ; hanc vero facultatem communem aliis corporis humoribus sanguis possidet ; nihil igitur hinc concludere possumus. Insuper, an duplicitas hujusmodi simplicitati naturae convenit, quae pleraque unam per functionem praestare consuevit ; quae, v. g. per respirationem duo beneficia oeconomiae, eaque summi momenti, consiliat. Denique, si sanguis eo principio, unde motus sensusque pendent, imbuatur, quamobrem, quaesumus, systema humanum nervis, ad hosce usus plane accommodatis, instruendum curavit rerum opifex ?

CXI. Hoc modo doctrinam ratiocinando oppugnare conati sumus ; nisi vero argumenta ab Huntero suam theoriam firmandi consilio adhibita * alio modo explicare poterimus, nihil valere ratiocinium jure existimabitur. Eorum praecipua idcirco nunc considerabimus.

CXII. ‘ The blood unites living parts, ‘ in some circumstances, as certainly as the ‘ yet recent juices of the branch of one tree ‘ unite it with that of another.’ Hoc primum est argumentum, quod experimento sequente sustentare nititur. Testis e gallo vivente excisus in gallinae, dum haec vita fruebatur, abdomen insertus est, ubi hepatis adhaesit ; gallina, quibusdam elapsis hebdomadibus, necata, injectio fluida a hepatis vasis ad testis transire conspecta est. Quoad hoc experimentum, quo argumentum suffulcitur, duo sunt notanda.

1mo, Partium coalitio. *2do*, Vasorum utriusque anastomoses.

L

I. Si

* Vide Medical Commentaries, Vol. 2. p. 199.

1. Si effectus, qui inflammationi superveniunt, in animo consideremus, prius horum facile aliter explicare poterimus. Neminem fugit, in exemplis hujusmodi, partes affectas saepe coalescere; in cadaveribus enim pneumonia defunctorum incidendis, adhaesiones pleuram inter et pulmones semper inveniuntur. Quod vero proposito nostro magis accommodatur, nonne via hydrocelen radicitus medendi, in quam chirurgi processerunt, a partium circumdantium inflammatione pendet? Hac enim excitata, adhaesio inter tunicas vaginalem et albugineam incidit, et cavum, in quo collectus fuit humor hunc morbum faciens, ex toto deletur. Nonne igitur ex analogia cogere licet, inflammationem a teste galli in gallinae ventrem introducto fuisse excitatam, quam partium coalitio consecuta est? Exemplum memoriae prodidit du Hamel ad hoc quoque spectans, ubi calcar gallinaceum ejusdem cristae inflammatione laboranti superimpositum, ei adhaesit, et cum ea concrevit.

2. Quantum secundam hujus argumenti divisionem spectat, hoc, quod omnes bene noverunt,

noverunt, tantum observare necesse est; cohaesionem, nempe, partes inter inflammatas per vasorum elongationem fieri, et talem certe extensionem ad extrema hepatis vasa, cum vasis testis introducti extremis, conjungenda esse pernecessariam.

CXIII. ‘The blood,’ inquit Hunterus, ‘becomes vascular like other living parts;’ namque, addit ille, ‘after amputations, the coagula in the extremities of arteries may be injected by injecting these arteries.’ Imprimis hoc in loco notandum est, hoc esse unius hominis testimonium ad suam hypothesein stabiliendam accommodatum; et quamvis nonnulli doctrinae eidem faverunt, haud ullus eorum tamen illud adhuc sustentavit. Nonne vero probabile illos hujus observationis, experimentum repetendo, veritatem comperire fuisse conatuos? Praeterea huic argumento certe objici potest, quod sanguinis coagulum vitam non possidet; namque per vitam vult Hunterus quandam proprietatem, irritabilitatem vulgo dictam, quae partes stimulorum actioni opportunas

tunas

tunas reddit, qua sanguinis coagulum omnino destitutum est: Sanguinem quoque in statu tantum fluido vita frui, opinatur Hunterus; an igitur nos decet concludere, sanguinem adeo diu in arteriis post artus excisionem extremis fluidum et quietum manere, ut vasa generare possit? Si res ita sese habet, quid in causa ejus coagulationis mortiferae est post talem vasorum generationem? Humor per hanc transiens vitam in illa, aequae ac aliis corporis partibus, certe conservare debet. Denique, Hunteri ipsius ratiocinium contra seipsum convertere possumus; probe enim sciens multa esse in corpore humano coagulationis exempla, in quibus nulla prognerantur vasa, asseruit effectus hujusmodi in omni systematis parte, in qua coagulum sese ostendit, non editum iri; sed in illis tantum exemplis, in quibus defectum quandam supplere vult natura: Rogare igitur volo, quamobrem tali opus est vasorum generatione in extremis artus mutilati arteriis? vel, quo consilio, natura inter galli testiculum gallinaeque hepar conjunctionem facit? Non-

ne talis generatio in concretionibus polyposis magis necessaria est? Hae enim, liberum sanguinis circuitum impediendo, multa mala periculossissima, et mortem ipsam, saepe inferunt.

CXIV. Sin vero, per experimenta repetita, vasa in coagulis arterias post amputationes occludentibus nasci, probari posset; hoc facile elongationi vasorum per membri mutilati inflammationem factae tribui potest. Doctor Levison, qui huic doctrinae favet, talem vasorum extensionem hanc opinionem firmare existimat; inquit enim ille, ‘ Is it not
 ‘ to be supposed that elongation is occasioned
 ‘ by the conversion of fluids into solids,
 ‘ which is done by the fluids in general uniting the sides of the vessels *? Nullo vero modo, quomodo laterum vasorum coactio elongationem facere possit, intelligere possum; vel, si ita res sese haberet, quomodo per vasa, quorum cava deleta sunt, sanguis posset transire. Aliter igitur hoc phaenomenon, vasa nempe in coagulis arteriarum
 orta,

* Levison on the blood, pag. 63.

orta, si hoc revera incidat, explicare conabor.

CXV. Animalium incrementum a vasorum extensione, per vires sanguinem in ea propellentes facta, pendere existimatur; et quo magis hae vires rebus fortuitis augentur vel imminuuntur, eo citius feriusve ad maturitatem suam pervenit animal *. Cordis et arteriarum actio praecipuis, quae sanguinem movent, potestatibus annumeranda est; exercitatio, igitur, et quaecunque alia has vires adaugent, corporis incrementum expediunt. Modo simili elongatio vasorum post artum abscissum exponi protest. Arteriae omnes, ut antea notavimus (XXI.), ramulos qui in tunicas suas ubique diffunduntur, et vasa vasorum nominantur, dimittunt. Artu aliquo igitur repente amputato, sanguis quantitate solita ad partem mancam perveniens, ulterius progredi per ligaturas vasis extremis injectas prohibetur; hinc in hujus partis arteriis accumulabitur, auctamque earum actionem movebit, qua in ramulos, eas pervadentes, majore vi sanguis impulsus easdem necessario elon-

* Vide Cullen, Instit. med. CCXCV. et seq.

elongabit, et ut in coagula penetrent faciet. Haec quidem mera est conjectura ; sed forsitan multis argumentis verisimilis reddi potest.

CXVI. ‘ Blood taken from the arm in the
 ‘ most intense cold which the human body
 ‘ can bear, raises the thermometer to the
 ‘ same height as blood taken in the most
 ‘ sultry heat.’ Sic asseruit Hunterus, et ‘ This,’
 addit ille, ‘ is a strong proof of the blood’s
 ‘ being alive ; as living bodies alone have
 ‘ the power of resisting great degrees, both
 ‘ of heat and cold, and of maintaining, in
 ‘ almost every situation, while in health, that
 ‘ temperature which we distinguish by the
 ‘ name of *animal heat*.’ Hoc argumentum
 quidem sanguinem caloris animalis participem esse, minime vero calorem sibi ipsi
 inesse, probat, nisi certum caloris gradum, in
 aliquantum temporis retinere potuisse, quoque
 fuisset compertum. Contra vero sanguis,
 simul ac vase quovis emissus est, temperiei
 aëris circumdati nequaquam resistit, sed gradatim ad eam sese accommodat.

CXVII.

CXVII. Quantum Hunteri argumentum hujuscemodi est : ‘ Blood is capable of being acted upon by a stimulus ;’ ad quod probandum notat, ‘ that it coagulates from exposure, as certainly as the cavity of the thorax or abdomen inflame from the same cause.’ Compluria huic objicienda sunt. Imprimis observandum est, quod multae res inanimatae eodem modo afficiuntur ; albumen, exempli gratia, ovi, quod nemo vivum esse existimabit. Proximo notatu dignum est, hoc fluidum nulla irritationis indicia ostendere, cum stimuli acriores ei admoventur. Mechanica enim irritamenta nullos effectus in id edunt, et sal commune, quod musculo applicatum actionem hujus validam excitat, tantum abest, ut sanguinem cogat, ut eum fluidum conservet. Denique, huic argumento objiciendum est, quod stimulus solido vivo admotus, contractiones et relaxationes inter sese alternantes, non vero contractionem diuturnam unquam movet.

CXVIII. Addit autem Hunterus, ‘ The more it is alive ; that is, the more the animal

‘ mal is in health, it coagulates the sooner
‘ on exposure ; and, the more it has lost of
‘ its living principle, as in the case of vio-
‘ lent inflammations, the less is it sensible
‘ to the stimulus produced from its being
‘ exposed, and it coagulates the later.’ Tria
huic opponere volumus :

1mo, Si sanguinis vita a fluiditate sua pen-
deat, majore vi vitali in phlegmasiis prae-
ditus sit oportet ; in his enim morbis multa
cum magis fluidum esse demonstrant.

2do, Partes inflammatione laborantes ma-
gis irritabiles fiunt ; idcirco, cum totum sys-
tema ea afficitur, sanguis, aequae ac solida,
stimulis admotis, magis sensibilis evadat neces-
se est.

3tio, Si sanguis serius coiens suae a sani-
tate aberrationi est referendus, unde citius
cogitur in morbis putridis, quam in inflam-
matoriis ; cum in illis, quam in his, fluida
magis afficiantur. Praeterea, cum contagio,
si ab effectibus quos edat judicare liceat,
vim magnopere sedantem habeat ; in morbis
ab hac originem ducentibus minus irritabilis

M

esse

esse debet sanguis, ideoque ferius in coagula abire.

CXIX. Quintum Hunteri argumentum nunc aggrediemur, viz. ‘The blood preserves life in the system.’ ‘When,’ inquit ille, ‘the nerves going to a part are tied or cut, the part becomes paralytic, and loses all power of motion ; but it does not mortify. If the artery be cut, the part dies, and mortification ensues.’ Hoc verum esse concedimus ; tantum vero corpus nutrimentum suum a systemate vasculoso, non nervoso, recipere ostendit. Ridiculosum foret equidem opinari omnia, quae vitae necessaria sunt, vim vitalem possidere. Si enim huic assentiamur, aërem aequè ac sanguinem vita frui, concludamus oportet. Praeterea, si sanguinem necessario vivum esse, quia vitam systematis sustentat, contenditur ; vitam per ea sola, quae principium vitale habent, conservare posse concludendum est. Hanc ob causam, quaestionem sequentem proponere licebit : Quomodo, nempe, vita ipsius sanguinis sustentatur ? Namque ab inamniatis

nimatis a viribus concoctricibus in chylum mutatis originem trahit.

CXX. Argumentis Hunterianis sic breviter examinatis, non unum quidem eorum invenire possumus, quod vivum esse sanguinem absque omni dubio demonstrat. Et cum fundamento parum stabili innitatur doctrina, hoc fluidum, quamquam ad vitam animale conservandam omnino necessarium, principio vitali minime frui, non concludere non possumus.

CXXI. In hac opinione excutienda aliquid auxilii a dissertatione inaugurali Doctoris Hendy *, qui primus eam impugnavit, deduximus ; cujus objectionibus alias adjicere conati sumus. Nos quidem minime latet, quod de doctrina adeo ingeniosa non satis fuse egimus. Cum de ea differere primum aggrederer, experimenta quaedam eandem spectantia subjicere in animo fuit ; sed temporis angustia, limitesque opusculo hujuscemodi praescripti,

* Vide Hend. Tent. Physiol. de Secretione Glandulari, anno 1774, edit. sect. II. cap. 3.

scripti, ea, praesertim cum nondum fatis lucida sint, in vulgus edere vetant.

CXXII. Manum nunc ultimam huic dif-
fertatiunculae imposituro, meaque in hac A-
cademia florente studia ad finem perducturo,
nil restat, nisi ut omnibus meis Professori-
bus, ob praecepta multa utilia, quae ex eo-
rum praelectionibus ingeniosis acceperim,
gratias quam maximas agam.

Memetipsum denique animi perquam in-
grati non incusare non possem, si virum
optimum et eruditissimum Andream Dunca-
num, M. D. qui mihi medicinae studentem,
praeceptoris, morbo laboranti, medici, et re-
bus in incertis, amici certi omnibus officiis
functus est, silentio praeterirem.

F I N I S.